

四庫全書

集部

欽定四庫全書

浪語集卷五

宋 薛季宣 撰

詩

漁父二首

蹤跡五湖浪生涯千尺綸是非寧入耳榮辱不關身獵
獵菰蒲暮淒淒浦溆春何時共蓑笠和雨釣青蘋

紅蓼白蘋岸清風江月明萬波千尺動四海一漚輕濁

酒醉獨釣鮮魚饑旋烹興來歌欸乃煙雨過前汀

釣鄉新筍

根節凌槐夏風霜閱草春此君椽筆健稚子錦綢新有
待瞻淇澳行將滿渭濱狂鞭任奔迸我不是饒人

白菊

不著金縷衣寒窓弄明月端宜妝淡泊自是香蓬藪臭
味真可人風流到華髮試為問東籬定得淵明骨

丁香花

別是南州種寒花七里香

鄂人號
七里香

玉笋駢寶髻金粟綴

銀鐺自得山林趣不為時世妝紫霞休騁瑞未及野梅

芳

立春

誰得東君信風生十萬家土牛占穀麥灰律動薰葭嫩
綠萌芳藥新紅茁綻芽未能都免俗春勝插春花

雪

怪得寒風瘦窓明積漸加起來裘潑水逆視竹生花厚

貌紛羣品新妝副六珈飄零飛落葉轉動絞回車無定
從高下忘形變邇遐郊坵鋪毳罽砌撒江沙灑壁侵
修飾填坑旋下窪屋頭昂怪獸山脊走長蛇萬木枝都
亞中庭石盡遮獅符蹲踰龍井噴增呀撲面輕盈甚
裝衣點綴斜礎閒開匣鏡碑仆插梳牙同色連千里虛
光合萬家壓災時世重為瑞老農誇勢極雲天際威凌
凍水涯凹兜坡嶢岬條突樹牙槎客子衣裳怯王孫酒
力奢影浮垂綉幌香帶落梅華麗簾知神女門屯想夜

又未能三十韻旋淪試烹茶

郊迎趙漕

叱御逆輶車愁先負弩驅虎頭晴在望羊角淖盈途草莽迷行跡湖山出畫圖傷今又懷古坐睡覺吳歛

梅雨

霖霖雨黃梅凝雲綰不開心知養苗稼眼見長莓苔蜜篋幾如漬崇墉勢欲隕鬱蒸任炎熱誰解酌金壘

遊飛霞洞

橫塘富花柳杳杳鏡中行樓觀朱涵壁洞天珉掩閣林
深暮雲合地僻夏寒生康樂屏巖靜鳴榔時一聲

龍翔寺

二江涵古寺雙嶼聳平沙翠浪環流淨金城到眼奢水
光搖殿閣塔景動龍蛇不減蓬壺意屯雲未許遮

酬張縣尉

久客多塵滓心懷為子開文知龍有種名苦雉為媒但
得貧無系何嗟去不來吳門衆多士待爾和羹梅

元夕憶世母

三八母
生日

蒼天毒我生顧復自孩嬰
元夜銀花合三山壽筭傾
星毬明烜赫鰲島峻崢嶸
樂事都如夢傷心母道情

拒霜花

蘸染木芙蓉深紅間淺紅
錦籠烘夕照翠袖揖秋風
艷冶歸尤物淒涼識化工
拒霜高節在丹藥謾成叢

早行

旅枕罷殘夢明星懸屋椽
不辭風露冷欲了東西緣
雲

馭方擎日月輪猶御天波波定何事羞死地行仙

天陰

梅月乍開霽油雲閒卷舒溢光穿隙日浮浸出清虛鼓
吹蛙聲亂笙簧竹影疎雨來三四點靜覺打蘆蔭

告歸郡不得請倦於將迎之勞

閒居百不憂何事武昌遊旦旦三江口時時十里頭箇
中都是妄此外竟何求生被浮名累將迎卒未休

昧爽寒溪送客

攀援長者車，昧爽踏汀沙。片玉山銜水，堆金日蘸霞。
風來雲外嶺，露重竹間花。好景看如客，心閒即是家。

二十三日送客寒溪還視邑事食時過節推周文
猶高卧未起惘然嗟羨以詩戲之

驚起周公夢，三竿日倍高。被氈吟不用，州縣職徒勞。
脂轄驅郵置，金車困賊曹。幾如陳處士，龍卧楚江皋。

夏日江濱

鳥迹鋪天篆，金波漾日沙。鷺拳巖積雪，風勺浪飛花。
江

斷客帆入岸回山影斜峰雲青漢上畧約二三家

聞黃仲益雲夢辟書報命

三府書交上羣公座盡傾量包雲夢澤名動洛陽城雞
肋刀焉用牛腰軸定盈江南望江北無可贈梅英

讀蕭銑傳

不假成田勢寧堪麥秀悲青氈梁舊物赤幟漢威儀剛
被農家誤俄推鼎祚移江湖百郡地只自黍離離

讀九國志悶書

弔古因紬卷傷神却皺眉蜂房開自牖蟻穴積成堤不
苦南風競長懷北馬悲陽曦曜星月還有餞西時

被甲

儒服便章甫戎裝乍鐵衣幾曾生共樂猶有死同歸著
屨惟何甚乘車未遽非愧酬軍旅問先見少知幾

曾陽回棹

河曲回晨棹驚飛羨水禽波紋沙隱見山影浪浮沈色
動蘆花雪光搖日脚金扁舟歸未得惆悵五湖心

讀三國志

左角蠻攻觸南柯檀伐槐俳諧記名字人物委塵埃錦
里昔曾到樊川今此來遺風不可見觀古意悠哉

讀史

信乃噲等伍宏與滔比肩饗士未為過出膀真能賢物
外體三極環中無二天傷哉千古恨顰蹙翫陳編

乍落回路得家書是夕有歸夢

夢入江南路依然識舊廬家人話生計兒子督程書繚

繞俗緣在纏綿習氣餘金雞驚悞我安問未為疎

三月七日按雲陂莊還宿舊州寺懷松楸後作

不學老農稼而為田舍翁劬勞方軫慮定集竟何功心
測焄蒿氣時寒疾甚風年時尚壇祭廢絕意奚窮

山舍三首

佛彷彿蠻室林端鳥道縈煙疑雲異色松接澗同聲樹
古龍蛇蚴巖巍虎豹獐野花舞狂蝶栩栩夢莊生

塢閣屠蘇小奇峰疊翠屏巖頭通鳥跡山脊走龍形峽

斷風偏勁林幽天欲冥流泉不知處虛谷響泠泠

寂寞無塵事茅茨秀嶺連密蘿蒙灌木亂石隱流泉
噪雲間樹鳥飛山外天孤雲自明滅應達主人玄

觀碁

戰伐徒形似死生俱妄為爭先明有法當局自成迷
多筭非關劫成功定出奇兩情深海若不比看人知

昇山寺

羽翼假真仙飛來秀嶺巔道高還自正境寂若為然寓

目山如礪昂頭浪拍天閩城多少地幕歷帶平煙

丙子歲春

物極雖云反寒威何大哀東風入簾幕生意滿林畦古
木含新綠仙葩吐舊枝陰晴苦不定中夜忍聞規

江行即事

春信潮聲急滔滔掩岸沙客船離浦溆漁笛起蘼葭盪
槳水光碎轉山帆影斜篙工指煙樹依約有人家

雪銷

旬浹雨銀花山林盡綺羅東風雲氣減南紀日光和皓
皓汚應易涓涓滴轉多永生又永釋天道竟如何

誠臺雪望懷子都五首

不見子都子誠臺一壯觀爛開梅骨峭高聳玉峰寒誰
共雲霄日詩亡錦綉肝夢魂千里道應更酒腸寬

故人一相遇七返霰漣漣辭采應奇甚顛狂即在不尋
思落帽會乘興錦官遊皎皎誠臺暮詩腸獨自搜

白也今良嗣千年壁一雙文思泉漱石色照月明窓樸

撇空樊渚飄零遠漢江此情誰與度木介響琤琤

狂遊失可人萍聚我和君千里共明月幾山空白雲擊

鵬飛墮毳嚼雪冷冰齟百歲無多子離居困索羣

李性剛直

同官目
為鵬李

掩脛誠臺雪吟頭祇自昂梅花開嶺路冰玉皴池塘良
馬日千里美人天一方尺書不可寄道義兩相忘

和賈簿

官冷君休歎浮名陌路車冰山逢燠泮豆粥併寒除但

酌樽中酒從堆架上書未酬題柱志終不羨相如

忌日雪

荼毒惟何甚同時失所天哀傷逢此日懷抱憶初年白
雪明心素青松點墓埏不堪陳几席罪罟欲誰寬

大雪

江市彌旬雪人行失舊蹤梅藏香骨瘦冰結浪花重彷彿
門前柳昏迷郭外峰屋簷天漢在一鴈沒遙空

喜雨

麥穗雖乾耳秧苗未吐心正須雲潑墨生怕日流金氣
鬱山堂潤風回竹逕陰稱人三四點爭道即為霖

春老雨寒醅釀竟爛

無定若遊絲神人薦玉衣飄搖思遠舉婀娜怯空歸曉
色檀心重春寒酒力微牽腸無柳眼香絮雪花飛

讀史

閒是等閒非沈迷不自知黃梁一夜夢白雪數人詩身
後輸杯酒生前對局碁幾多亡國恨窓几靜樁願

延陵感懷

延陵七春夢悲切意更微頗復吳牛喘還多代馬依去
來紛混混今昨是非非沉在遼東鶴千年方始歸

雪霽和智叔次諸郎曹韻二首

風洗朔雲靜愁蠲泪眼睛夜闌灰欲冷目眩室生明客
子遠鄉巷天公偏世情布衾寒潑水墜葉也心驚
同雲起飛絮忽作無意晴夢破客愁絕魂銷天夜明聞
雞悲壯節哀鴈切鄉情夜靜羣動息空牀時自驚

元日

鳳歷回龍紀義和御物新崎嶇萬里道牢落五年春
客聞哀鴈傷懷念昔人米鹽能幾許還自不由身

夢回二首

憶到梯雲巷哀傷韓鄂叢舞鸞悲引鏡傷鴈落空弓清
夢回時雨繁聲發夏蟲情鍾在吾輩匡坐泣薰風

梯雲走家

坊名

吾宗鮮兄弟何事日飄零凋落皆鵷鳳相從謝脊令世

緣那可了魂夢也非寧屈指傷心事端如欲曙星

鄉思

達仕租千石虛名酒五經豈能千日醉未勝九年耕識
取杯中趣知從袋裏乘讀書無一事官宦汨平生

寒食二首

異縣臨寒食為情覺大難煮蒿五精氣破散六祠壇墮
淚紛朝雨回腸減夜餐誰家簫鼓咽懽舞欲槃跚

五歲懷歸夢言歸已得歸未能逃俗累旋復著征衣子

貢當何戰燕人切自悲無堪一百五春雨作霏微

感事

狐死正丘首鳶飛翰戾天乃如司馬晉不若慕容燕濟
亂須人傑投機報世賢長江千古恨南北幾陳編

鷓鴣

鷓鴣滄江外雌雄萬里心浪花浮彩翠煙雨弄清音
蓼岸無端艷蓮塘底處尋鴛鴦誰著色知誤幾金針

讀卽報二首

大漠煙塵靜三公計畫奇定安唐廟貌行復漢官儀捷
奏騰千里除書滿四維自然禽頡利蚤晚贊無為

世味刀頭蜜人情屋上烏榮華葉子格升黜選仙圖豺
祭知生獸虵銜欲報珠不將魂夢到反是憶蓴鱸

九月十日菊

不改天香細無端人意疎重陽把盃者今夕尚來與白
羽搖依舊黃裳笑反初知時自凡俗冷暖欲焉如

夜聞捷音

圓覺聲聞夜蒙頭大比丘上功來幕府如用復東周行
即昇平舊還從汗漫遊憑誰問淮蔡元濟莫擒不

悶成

春鳥弄輕澹凝陰滿院飛蠶姑云力作杜宇不如歸世
變知音少人亡解語希汗顏多反仄濺淚濕單衣

春陰

讀王黃州
小畜集

春晝閣春愁無情若隱憂柔腸牽柳眼困淚點花頭不
放春風度從教暮雨休哀怜無限意小畜閔黃州

燈花

自得天然艷書窓氣吐虹有心惟燭物無種到施工不
管三春候平分兩曜功報人知喜事誰辨悉歸空

送鄭景望赴國子丞詩二首并序

淙之江潭

但漫平聲

而委長有山焉截乎江之口

其潮也尾間盈而潰瀑海水溢而羣飛回江之
波倒流而反觸於山其濤怒衝乎潭其波激委
之至也遠其為憤也瀉崩騰洶洶洄滴藏昂驟

威而軒乍旋而入於盈淵谷前無高岸一川轟
立突如來如屹如銀山轟如陳馬轟如雷鼓激
如搏鵬子胥奮躍於濤頭文種昌揚其暗浪雖
共工氏折不周之柱左伯母彈恒山之目拔山
如項羽驅石若始皇未足以擬其壯天河裂龍
門發呂梁洩汾防決淮隄撤猶不得形模其仿
彿也操舟者逆而取之順而方之呼吸之中恬
然已無事矣濤之力也有既故吳兒可狎而弄

其去也有時故行人可厲而涉走嘗聞諸濱江
之老叟曰江之產有煩苛其涉有陷沙煩苛豸
也螻族比也形如飄瓦呀吻衆多狎者遭焉則
著身而不寘沙之雜也多淖則人之履踐不實
涉者俄而陷溺則僵為沙之濫君子者曰操舟
者子其神乎憑乎虛舟凌乎巨浪逆而取之不
害其為正順而方之不害吾之止故雖濤水掀
天而吾不為之蕩橫流溢壑而吾不為之撓持

危涉險亶默而成之其眎涉者吳兒為有全安
之數矣子鄭子一鄉之望其赴國子丞也固當
為時世用鄉人又將儀之夫國子清官子鄭子
和而不流者也既清且和利用安身而崇德矣
其行也必將問津於浙走期之以舟楫之利琢
詩為贈且序陷沙煩苛之說所聞於父老者而
冠諸篇端

風喜檣烏順知難喚酒杯好溪寒已半京洛暖應回僧

舍方飄雪江籬欲放梅不須愁國步之子棟梁材
愴我論交晚何堪又索居朝陽鳴必鳳清水察無魚百
惱愁成斛羣疑鬼載車否臧亡可道羸得腹詩書

浪語集卷五

欽定四庫全書

浪語集卷六

宋 薛季宣 撰

詩

送鄭景元赴秀州判官詩并序

走歸自武昌始獲交於景望景元昆季二鄭兄
弟不以我之無似不屑與之友居之相遠也相
從之日少志之相得也相與之意深居數年景

望召為國子丞又兩踰時景元赴由拳從事走
素寡合起數澤鵠鵬之嘆於景元之行也贈以
詩而序其意聞之君子送人以言衆人以財走
雖小人樂為君子之事方浩浩之會走雖以天
而免秋田粒食悉漂泛於洪波既無財以贖公
之行不可抗手而別以言為贈猶不害於人情
景元既高於才又果於志喜竟其說人不知亦
囂囂固賢人君子之心非處世之道也古之人

教其子者有曰女戒勿為善曰然則惡之為乎
曰善不可為惡將安取有佛學者弟子禮其神
像而師杖而起之弟子者曰禮佛亦好事也為
師者曰好事不如無世衰道微士鮮中庸之行
其從政者非違道以干百姓之譽則拂百姓以
從己之欲要譽者不欲人之加諸己也窮欲者
甚惡人之形己也此人之常情幕府之官無曹
局之分也從容賓主之間其處此亦難矣非無

心於為善寧無二者之猜乎魯人謂孔子東家
丘舍者與楊子居爭席盛德之至不如是不足
以有行也走欲景元事其上官其賢於人者約
之於道否則濶其小者以求全其大者掩覆吾
迹無為為善以近名聰明睿哲而將之以愚亦
充之爾耳景元固無施不可此焉發軔庶乎其
善始也以景元之敏於行千里之外能無從此
言乎景元景元願不以人廢言也乾道三年四

月二十七日友生薛某

恢台煽炎毒萬里無來風殿閣少微涼況乃陌路中紈
扇可把揮秋高網絲蟲冰山豈足恃見覲聿消融進退
信惟谷黃塵柰念念鄭君冰雪姿干將倚崆峒竭蹶救
頭然巾車佐元戎生人在熾炭吾何憚蟲隆往聞開元
帝逃暑繡嶺宮偪仄政浩歎木陰見姚崇煩溽頓以銷
語識靜勝工相期在此行山泉養童蒙

兄子象先罷公試歸知武林動靜成古風三首

黃庭有真詣魂升魄入淵知機動以食還反道自然嘗
聞鍊色石可用補蒼天時哉復時哉寧教悔在前

野鶴入雞羣猿豈王孫輩之人定忘物未足言身世丹
山兩鳳皇為誰來噦噦靈龜發與盼可以卜隆殺

明珠以彈雀得雀亦亡珠颺驚以當鷹夫豈獵之徒黃
金有定價韞積合藏諸薰風扇餘涼吾方愛吾廬

元夜齋居

元夜憶年時忘情居灝灝縣齋今夕居曷為傷懷抱都

緣人事非不覺年時好世母舍我歸屈指憂吾老人亡
不可見此心為草草大人月云忌棄我方兒祿呱呱救
嬰泣安知請丘禱諸父洎諸兄下世吁何早悲傷失所
恃涕淚流行潦哀思動時節不見蓮燈好鄉居計日長
松楸倩誰掃諸母侍何期念舊呼穹昊

春雨

春雨不知止新晴旋復陰霏霰散秋毫虛簷水鳴琴琤
琤響疎窓庭除有餘音跬步莫可縱蒼苔看浸淫縣齋

知幾秋中堂漏相尋涓涓濺人衣黯黯乏勝襟發篋漫
如清明昨暗沈吟條然薄雲開風聲到園林坐覺筠筍
芽羅鞭粲脩森巾車過坊市溝渠漲江潯言歸轉通渠
舉頭見西岑峰青霧銜白何堪送迎心

春江小雨

小雨春風裏澄江滿漲痕沙平波渺渺山遠霧昏昏短
棹煙塵細浮雲天地根將迎倦無已羞目舊杯尊

春雨

春光不滿百霧雨六旬強眠蠶老脫殼隴麥青已黃愁
雲密可厭慘澹空滄茫銅盤旦日出障彼天一方寒簇
歎巧婦姦娥會飛茫豐隆况枕祠離畢占是常庚午直
甲申此意未遽央使客困羈役行留兩亡羊

雨中鶴唳

陰靄結愁思秋霖政靈澍何天唳鳴鶴嘹唳烏雲路九
臯聲甚遠底處披冥霧定知君子化不作乘軒汙介蟻
六王師櫛沐方暴露芻輓苦不繼曷保金湯固塗泥困

淹沒無計開樊笈傷古聽華亭吾心向誰布

種蘭

蘭生林樾間清芬倍幽遠野人坐官曹茲意極不淺西
窓蔽斜日松釵架春晚牆陰蔕花木憔悴根日損植此
山國香坐與前事反扶疎可紉佩心緒端有本芽生僅
盈壇高風九成畹羣芳顏色好祇自誇園苑何如淡嚼
蠟草莽曾誰混對我靜無言忘形如笨尊

讀東坡和靖節詩

我讀淵明詩頗識詩外意坡公繼逸響箇中有佳思取
友百世上古來獨二士陶固泉石人蘓則廊廟器出處
了無同聲名都自異往者不可作矧復通姓字神交定
忘形飲食尚知味麤糲中聲律片鐵猶應類茲文在尼
父為復昌旦事今時道古語莫作今世視以我思惟心
充彼剛大氣芥子納須彌誰信畧相似

欣木亭詩

某適宛陵始識林君擇之用中於鄭景望司馬

之館察其為人肅恭謹敬學而篤志者也出其
家欣木亭詩冠以晦菴南軒三山三先生之作
索和甚苦金玉其音難乎下俚之繼黽勉次晦
菴韻其不知量甚矣

寒威折青陽雲雨作朝暮槎牙粲新綠寂歷晴川樹時
至物皆春豈在雲間露之人於亭上笑歌誰與晤勝此
榮與華我亦知嘉慕來游對溪山識取亭中趣

早起次叔瞻韻

日高政好眠披衣意何已不得戀黃紬弩頭非所喜厭
浥行露多忘却佳山水有客愛閒居被髮吟早起神清
到天元靜極照物始公乎尚何其我亦偶然耳此事叵
立談剥剥自鳴指動息無端環生人定一理

聞競渡聲

江頭鬧金鉦競渡記時序欲弔大夫魂正則知何許情
緣古今隔況是都無楚悲歌永為戲拯溺憑誰語曰我
舊家鄉湖上人如堵船戰習成風迎神尚投黍家居內

忘物廢聽何城阻風聞不貳事借問為情緒

冬至和輿醪醪有華

我愛醪醪花爛漫春歸後薰為美人佩韻勝青州酒
漉落霜霰搖曳歌風柳別來能幾時夢寐依三后一綫
長新陽萬木新凋朽佳期尚云遠盛意胡偏厚秀色笑
江梅遊絲入窓牖遙知此粲者為瑞朝中否銀蟾待交
映天上彤雲久金樽但高酌身外閒愁剖休言桃李華
常暘又何咎

刈蘭

東畹刈真香靜院簪瓶水高遠不勝情時逐微風起和
雨剪閒庭誰作騷人語記得舊家山香來無覓處

石盆

髯翁久埋沒歲月來成奔當年膾魚處齏臼徒形存想
方高會時猛士侔雲屯連鰲覲一釣欲以大口吞尺鯽
劉紅雪烹葵植蘭蓀王餘弃玉食銀刀亂汙墮臺不
禁醉網漏如鯨鯢座中盡羣彥人亡失叢藩吾遊懷此

都重到郭外村聊興廣武歎衰衰受辛盆顏然鳳凰臺
路走臨津門催歸趨人馬誰念古帝魂愁無有力者
樽負雲根斯焉共杯飲垂綸具盤飧

富文忠公北使與
主客儷句以一大

口吞對其
竹一十竿

止齋和七五兄次淵明止酒詩韻

知止良獨艱吾兄獨安止不知郊園外只止塵埃裏脩
為止至善孝愛止為子眷言兄止之得止以為喜至止
內泓澄非心止弗起止靜有餘歡止中得妙理勿謂止

為難止躬徒正已止乎吾未見致知知止矣吾兄止孰
似兄止無端涖艮止視兼山止斯千萬祀

重陽無菊

二九節重陽高風振羣木彼菊東籬下金英粲清馥中
有黃裳美雅稱清人服歲旱靡百草茅蘖渠能育冷淡
登高會悵望矧可復空酌茱萸酒帽墮慵舉目愧乏淵
明流誠為淵明縮借使淵明作風景更悽愴

九月猶煖梅桂有華

兩雄木並蒔丹芍被春芳同仁乃一視梅桂華秋陽梅
固冰玉姿桂不時世裝永言異會遇相從多異香瑣屑
辟寒金磊落明夜光仙人姑射山墨允期首陽神交際
道義語默何曾常

患盜

盜賞自孤卿布亡由令尹政乃可同形殺人在同殞吾
非古之徒處世良不盡仁義一遽廬身心兩矛盾坐使
邑中民瞽瞍困欺窘劫質與穿窬公行載歸稠道路視

秦越對此獨何忍刑德歎誰施茫洋空內愍仲尼有佳
對為發一笑戰

又和元可二篇

陽春倡者誰欲和心已闌故鄉千里隔念之一辛酸人
生足離合豈在共盤飧胡然兒女情苛留太無端焉得
不繫舟使我懷抱寬信美非吾家會且即所安後園桃
李秋蕪徑草木繁酒來輒竟醉歌強難為歡風雨打寒
食枯蕪盡瀰漫故乏猜嫌累誰能整其冠惟當適意爾

昌貴品極官晉賢泣楚囚衛女賦竹竿願君憫羈思所
友路何曼歸哉昔在陳孔聖乏體胖幸非艱棘徒亦復
謝樂樂

春風動鄉情燈火語夜闌遙聞流星遞鈴響接悲酸愁
人念世事臨食或忘飧我有無價珠可以息爭端致君
昭代隆坐使北顧寬何當內修治邇服遠自安呢呢兒
女子青蠅語喧繁長懷不盡憂可若一笑歡有酒且強
醉莫等白露漫汾陽脫兜鍪登高祖溺儒冠此意詎未央

抱關樂卑官匡牀足酣眠紅日出三竿
騰言東甌道來歸路曼曼非行徒爾為
寂默體用胖天地一大家中庭樹樂樂

得符速走之官

我本樂閒人自得安閒志鄙性習疎散
誰識榮華意竭來復舊廬喜獲平生志
稼穡任佃夫家室歸中饋中外若非我
卒歲無他事飽飯讀詩書薈騰時困睡
嘲啁燕雀懼鴻鵠心應異三皇竟何物
况復今官寺寒餒課妻

拏先春輸典質茲乃不可常為貧求祿仕版籍一書名
野情那得遂官來促我裝去作塵埃更無復有逍遙真
為口腹累把板從此行短褐隨棄寘素飧良不堪邑有
民人寄衆心險山川道微非所暨上恐負朝家終念家
聲墜吾民政焦嗷為此不能寐格物可為邦舊說今難
試泥古誠腐儒惟此知為治仁義舍不為又敢圖與利
上官如我容刑章得就易庶以遂其生將久蘇疲瘁此
意尚茫然思之或狂悖

鷓鴣

鷓鴣何翩翩鎮日煙波裏將柰網羅何幽閒從此始一
為美人玩毛羽傭復理江湖浩蕩意憔悴蹄涔水昔是
滄溟遊今是樊笈底文章豈是貴步武難無已丈夫感
茲念心逐冥鴻起

社後即事

東君識歸意社雨零齊沐柳眼向人青草芽隨地綠體
輕來燕疾聲合鳴蛙蠹桃李靜無言艷麗驚郎目

西山野步

雨夏作晴天浮雲帶溶洩西山旦驅馬踏破蒼崖翠寒
泉漲新綠決決鳴環佩上有吳郊峙九曲羊腸細築閣
聽松風縹渺江無際野僧喜我來一見心已醉竹萌薦
飡玉縷切琅玕碎吟哦壁間詩恍與古人對時發一笑
粲韶聞殆忘味清遊淡何營不知夕將至岸巾步筇谷
欲往叵自遂酌此菩薩泉為澣濯惡世

陳思王

喬松產崇岳託迹太高亢飄搖風雪場踈局蛟龍狀干
霄竟何事勁節良獨壯下有楸桐秀遠入煙霞望天意
固有在人情亦云妄苦乏柔苗蔭直傲清霜量居然嗟
彼其坐使出其上至哉文身子三以天下讓

步抵東坡登舟返石門

為到西陽城侘傺東坡上舊址就荒蕪山川寫心匠四
見聳高寒周遭畫屏障萬象儼朝昏出沒煙霞狀元覽
浩無涯不覺滄溟漲吾行半南州此遊誠大壯寸陰良

可惜無柰歸船舫隕然快哉亭昔夢今知妄吳都一回
撓杯飲窪樽浪石門隱漁舍行復殊亭剏叩竭兩端倪
便可齊得喪

邊事方急有中使至雨中出郊候之

霧雨閣天愁秋笳聞人耳不見霍驃搖只見黃塵起蔣
城何崢嶸橫流混淮水教戰聞市人旋柵荒殘壘甲道
軒脩竹亭觀羅弓矢長城萬里壞衣帶江誰恃橐鞬道
左立一介來行使束帶迎督郵淵明尚深恥

春陰會聞懸瓠不守

飄風吹百花仰不見天幕浮雲何慘慘去我止一握園
樹暗無色紅芳旋凋落摘索晚來雨如絲度城郭愁人
故多情對此乃非樂羽書絳囊馳傷春重沈著方鎬若
涇陽龍吟怨清角歸飛看提提紇真問生雀

雪蛆

冷冷雪中蛆皎皎夏之日藉彼凌厲地生此柔脆質冰
山共攸遠玉筋無定匹安識時有暑但保歲云慄中和

歎何居以熱信所必火鼠可澤浣朝菌寧晚出伯翳謂
更名山經注遺逸

新作殊亭

虎將夏中時旋復怡亭址茅茨覆采椽樸拙亦可喜建
斗五移杓殊亭更釋子規摹雖少華不陋復不侈元碑
碎俗令遺集裒空紙縱步此山椒金聲獨屬耳舊亭苦
弗稱新亭直殊美書文兩奇絕蹤蹟存布指古人久不
見今人尚殊此能知古今意元始本無始

又讀陶靖節詩次前韻倣其體

濁酒自傾盡陶然忘古今橫琴寄逸響聊以寫我心
矯兩白鵲盤旋下曾林此情誰與傳無絃有遺音萬籟
夕已息寧知身是今浮雲翳青空油然起無心寄傲北
窓下驟雨落疎林遊子為三歎寥寥希太音

開渠

開渠引簷溜涓涓遶茅楹政爾江河流鏘如環佩聲澄
瀾漾淪漪曲甃隨淺清上有翔飛蚘無殊化搏鵬廣狹

詎易量大小終強名何從汎天潢同歸在寰瀛吾慚論
齊物揚波歎平生

瓜期代者不至

禽飛有倦時木落還逢春薄遊名利場厭見陌路塵指
日得終閒憂情難重陳如此代者何不至愁吾人

代者介至

縣道簡書密束身急於繩初心豈得在反身但兢兢安
得事大好官籍知有承屈指計來月瓜期閏云增彼乃

未易到吾行重難能百里半九十終更仞階升社雨晚
來急春天霧夢夢清淮萬戎馬咫尺方沸騰暮年念天
遠歸飛恨無翮慙謂典吏用之筆緘滕

袁山春望

密雨作春社袁山暫登臨迎人多野花對境清道心于
以今日態而開去年林平沙沒浩蕩漲水相浮沈草綠
湖萬頃峰青天一尋無情雲自閒此理吾難任故壘堆
明玉寒溪疊重岑謁來聽流泉可用資鳴琴新霽石磴

滑崩波馬蹄涔不知日已暮迂回樹生陰歸路尚脩阻
時哉羨靈禽

重陽馬上看菊

秋菊粲真色落若千金卮對此好時序馨香散幽竒
爛漫在伊昔邂逅不可期吾來倦逢迎玄黃馬常馳二子
復何事相從意熙熙犇走塵埃間一見感我眉嚮之念
佳賞慙顏朶人頤

浮槎

浮槎爾喬木來從何處村託迹久非地湍水撞其根一
辭古岸頭去去隨潺湲上有飛鷺翔下有白浪翻浪激
信反覆鷺去無回鶩十浮將九沈任彼回風掀飄泊未
云已驚落見者魂今憑逝川波故憑川上原原中復何
有草木故自蕃洄流潰前汀薄命嗟獨存人生盡如此
株木奚足論

雪

太素欲還淳熙然萬物春封條花爛漫飛絮柳紛繽玉

殿神光發金樓火色新簷高天漢接地遠蜀江瀕西塞
雲填谷南湖浪拍湑吠庵欣掉尾饑鳥困依人躡屣蹤
存齒翻車墜到輪窓開羅岫失檻倚鑿池堙鑪炭情偏
愜冰壺意亦親郢歌休待和大化席紛紛

桃花

桃花如美人靜有嬌春態醉眼柰愁何多情破新睡裝
成開笑靨天裊腰支細不語傍斜陽鵲立塵寰外煙遠
鎖眉顰東風羞嫵媚倏然歎零落灼灼無窮意會訪武

陵源一飲流霞味

春陰三首

春陰一何甚愁結窓外花細雨打疎竹娟娟草新芽眷
此忽中慘吾生浩無涯閒讀几上書可歎復可嗟時流
諒難追世路亦以賒折腰墨綬卑坐有憂患加官柳絮
新綠黃鸝語淫哇把盞但心醉天外日已斜魄月沈半
壁歸飛噪啼鴉仰頭望虛碧冥冥密雲遮風塵政昏暗
逃形乏浮槎顧影還自笑狂遊蕩無家弩頭強應世鈍

若倒拔蛇先人營舊廬清池傍蒹葭芳時綉文錦翻濤
散晴霞霽色故自好風霾益云嘉何當舍此去忘情傲
丹葩

逼社窘陰雨園花就凋零翩翩蝶翅重好鳥無一鳴山
頭霧露白簷前砌苔青旁瞻隔遠到內與愁思并縣小
文書省艷茵匝莎庭舉頭歎世事坐有百感生芳林墮
玉蘂垂楊結珠纓傷春復已半忽忽難為情竭來發書
簣悼往心自冥袖手一凝竚意逐飛鳶行中原政紊亂

悲角揚哀聲有酒不解飲何以解我醒

社雨打春色催落枝上花天風振疎篁離披亦云嘉為
此念疇昔官曹輟食霞暮蒼遠夢夢裏中感生涯落花
故有時摻摻筍當芽芳菲日已老吾遊路何賒宇宙一
悽慘桑榆未還家詩情不自禁荒園鼓新蛙

讀靖節詩

淵明鳴素琴無弦有遺音善聽非子北寥然賞知心聲
滿天地間清越窮幽深遊魚漾澄瀾宿鳥投故林忘肉

為聞韶義皇到於今

跋東坡詩案

南方有佳木遠在漲海涯沈水產其節雞舌生其肌結
根松栢場龍腦實離離蜚獠豈知貴斧斤斬樂枝椽為
糠粃槽將食大與狶條枚惡髮曲芟除棄江湄滄流蕩
回波不與朽壤期年代知幾閱愈久乃見奇根株到餘
捭復恐分寸遺終焉盛芬烈蘭蓀謝芳姿

還返釋言

先天有貞數八卦因皆九升降周六虛利見龍無首後
天奉天時不在先天後得一定存三元中急須守道人
與我言熬水可丹成陰陽忖節度金玉爭精明問之誰
因爾惟言火力停毫釐謬以消造物亦何情揉木以為
輪寘之溪之干微流蕩輪輻銀濤立飛翻三田接餘潤
九穀歸其根灌溉有如此愆陽何足論接竹引巖泉遠
在寒谷幽然炬火其端高飛北山頭可以活三軍梅林
意悠悠倒置未為戾見之復何求陶甕與鎔金火出資

堅久炭木已焚如萬祀長不朽功成在鑪竈鑪竈憑何
有不見古軒轅鍊實荆山首嘗聞曾子書金火中外明
圓方遞含施二景參黃庭天端月虧盈宛在日之情誰
何液渾金坩鍋置煎烹律管實葭灰氣至颯以升日至
幕寒泉水花結輕冰應候固應然違天亦何能時哉復
時哉尺璧徒自輕襄陽庫露真木器塗髹漆髹漆厚以
堅札去移凡質蕃戎豈不詐信是真山出所以蛇化龍
頭角非曩日苟晞有逸牛往返日千里烹之剖其脊比

竹雙筋起強力有由然物性都如此本立而道生人身
有真理蛺蝶血可還錢書符能已瘡感召有如斯還丹非
外作得意以忘言象數求還錯無為四時行天遊有真
樂



浪語集卷六

欽定四庫全書

集部
浪語集卷十七

詳校官庶吉士臣何道沖

主事臣呂雲棟覆勘

總校官進士臣朱銓

校對官中書臣宋枋遠

謄錄監生臣饒文洲

欽定四庫全書

浪語集卷七

宋 薛季宣 撰

詩

樊口候參政暮歸

搖兀孤舟東復西
颺從赤鼻下樊溪
驚鱗斜日銀刀亂
飛鵠滄波羽扇低
江漲清泠舞洄洑
岸頽浩蕩汨塵泥
黃昏盪漿窳樽上
笑指天閨認沐鷃

聞中司還旆清旦踰樊嶺候之不遇自黃子磯乘

舟而歸

萬松晨過馬蹄疾五水春來湖草長官柳弄煙天已曙
山花無人風自香濤痕石磧記江劑檣楫蘭舟搖夕陽
送我不如歸去也啼規夾岸切愁腸

夜憶吳江

虹梁新霽倚東隅還憶松江枕太虛味比蓴羹下鹽豉
賢為菰菜憶鱸魚清風帆慢輸歸客落日蒹葭稱晚漁

會帶苓簪鎮浮浪扁舟斜掛一蘆簾

過樊山

誰將春信過中江草木無情取次芳妝罷美人梅破額
愁成行客柳牽腸江灘鑿鑿添新漲沙塞茫茫反夕陽
款段跼蹄樊嶺道幾多畦町雜蒼黃

樊山春望

飛出仙人壺外天壺中日月故依然虛明百雉龍鱗動
空翠千巒翳羽鮮咫尺畫圖藏世界侵尋錦綉簇山川

歸來身入寒谿路恍若瑤林一夢還

濟江逆田開府過西陽俞氏家林

輕舟時復到齊安一過漁家一點顏
江打頽牆開野徑簞生故壘上家山
蕭騷城郭塵埃外縹緲煙霞雲水間
便好繫船終日卧官曹不許片時閒

聞吳王城中軍戍嚴鼓

年時芳草碧蒙戎聒耳新聞甲夜風
軍吏誤應非進鼓天王錫忍廢彤弓
剛言苻氏難傾晉不信文王可伐崇

擊柝杜闕無箇事釣臺江月靜朦朧

宿大城寺與寺僧行都子故城於壁壘間得銅矢
鏃土中螺殼往往不壞僧言初作此寺發殿基
下有古甌渠宮城中得銅矛矢鏃百數南城中
土窖積灰埋鵝首骨猶具自甕城北望有郡王
墓僧云其傍墟塚甚多王墓常有巫者發之未
開被蜂毒死巫家於懷袖間得蜂乃黃金所化
二千逆數到春秋戰國興亡一轉眸壘壁詎銷埋蚌殼

劫灰寧燼斬鵝頭墳緣開發金成范殿為焚修瓦出溝
哨矢焦銅傷我意古來爭戰幾曾休

祈晴車中望安樂宮故址

罷休祈雨又祈晴天道難知得好生鐘鼓鏗鏘西佛寺
草芽荒穢古王城溫輿即就涼輿便陰氣潛消煖氣盈
棲鳳未堪雲尚密照人日脚尚微明

寒食甚雨中泛東舍溪偶晴遊張公石室三首

蘧蔭煙靄入浮槎
晷畫溪干阿果家
浩蕩天風飛羽蓋

繽紛法雨落曇華
既懸飲澗猿連臂
魄褫投牢虎落牙
豈是仙翁未神聖
笑談為我放靈鴉

天遊無事月中槎
物外仙靈別是家
老蝠有方精不化
白驢絕迹眩生華
竈餘丹藥清毛骨
澗吐清泉厲齒牙
回首周郎斬蛟處
晚雲當面舞神鴉

天河重泛客星槎
便好成都訪卜家
渭水未成浮竹葉
武陵猶記落桃花
華傳聞鐵騎充牛口
暗想樓船破虎牙
濁酒一杯山水綠
棹歌三疊百啼鴉

周將軍廟觀岳侯石像

侯祠初毀道士不忍壞侯像沈荆溪中因得不壞

二首

萬死何知獄吏尊威名蓋代古難存

侯初下大理獄吏執筆請辭大書其

紙尾而脅之曰汝觀今世烏有大臣繫獄而生者趣具成案吾為汝書

二桃豈以功高賜

一舸不容身退論幾見飲江思道濟繆為圖像削王敦

沈碑千古蛟川恨留與無窮客斷魂

軍聲良苦聽南風說禮敦詩也不容鬪螳達聰良是病
戰蝸流血可同宗親疎間入聯鑣話真假言從躡足封

趣詔河陽長已矣隆中悲切起人龍

雨後

攪人無賴是東風掃盡春菲一雨中窓外遠山裝暗綠
眼前佳卉夢新紅梅生樂園枝如綴草合誠臺路詐通
芍藥牡丹知漸老折來瓶水翫芳叢

連日自退谷路抵袁口

晚煙暝雨不勝愁改日仍為退谷遊司事守田如有意
催歸脫袴感行休連營谷里旌旗暮細草杯湖荷芰秋

果下馬拖泥水去石頭路滑且夷猶

雨後憶龍翔寺

好溪東赴海門秋中有禪居湧碧流潮信往來雙別嶼
世緣生滅幾浮漚菱歌面面來漁鼓燈火層層到客舟
何事瓜期外留滯短窓斜雨不堪愁

春遊懷古

登臨一度一傷神功業蹉跎萬物新飛鳥遠歸雲外嶺
賞花頻對眼前人茸茸雨脚南郊暮種種茅鍼太極春

鼓掌只供漁父笑
竭來生水拍江濤

寒食遣興

介子龍蛇亦大靈
禁煙猶復雨霖零
時風未辦作寒食
春事無過醉醪酲
取士語乾三禮穴
延賓為屈五經瓶
明年此日家山路
滄漠從君看水萍

縣舍醑釀始有開意會走遷居簿廳

芳叢累累結珠璣
雨後芬香郁麝臍
半醉半醒春晝永
載行載笑洞仙迷
青蛇眼見遊飛霧
綠綬生愁解佩觿

舉袂與君為此別幸傳薰德絳囊攜

落梅

過仲尹於東園
隨所見而賦

東風一夕報春來管領羣芳次第開
出岫白雲如有意照人明月幾難回
縞衣聊復歸三島綠醕無辭舉百杯
真味不須談鼎寔等閒誰識鑠梁材

折枝水仙

西子苧蘿溪浣紗李白捉月千丈波
風流東迤去不盡玉釧猶傳金叵羅
菱荷蒲葦爭清泚微香密與和風起

可將齊潔祀王明為言酌獻持杯水

錢湖有水
仙王廟

月下酌醪

噴人清馥徧閒庭心醉銀缸對醪醕高髻月娥呈素面
孤雲天蓋拂明星腰支天裊愁縈緒玉佩招搖尚典型
著意政須延永夜新條明月定飄零

和許簿牡丹二首

天與花王化日舒可堪買酒共提壺荒涼洛苑芳菲甚
落寞揚州氣味殊傾國幾迷狂舞蝶還錢不得迅飛鳧

清愁懷抱多春感一葦懸知此意無

清江不解蹋長蘆悶向花前問玉壺秀色可飡誰是伴
濃裝獨立自應殊醉傾鏡外歸鍾酒飛盡人間幾血鳧
多占春風稱第一檀心知有謝來無

復和仲蟠二首

開緘豁豁皺眉舒一首新詩酒一壺寒食禁煙春已半
佳人傾國態懸殊園荒不減遊羣鹿才盡應悲短續鳧
有墨牡丹君種否鄉邦能借一畦無

一見春紅意已舒何須幻化入懸壺含芳鎮日香千和
作態臨風色萬殊曲檻乍開金鏤鳳清池斜照玉為鳬
洛陽擬問名園在王石如今解接無

思鄉奉和

杯室開門傍石泉平生活計枕書眠但知身世非人界
不信方家說洞天陋巷分甘顏子樂一瓢所得許由賢
年來把板塵埃去笑殺商山四皓仙

和錢都官

道學從初小況雄文光萬丈吐長虹凌霜壯節生來勁
噴玉清詩老更工折檻定須回日御昭闇端復悟天聰
願公赤舄安猿轡幽國何曾有變風

和元直

疇昔相要學屢空蹉跎行即歎龍鍾三千牘欠東方奏
十萬兵無小范胄大愧入關歌一箭終期出塞傳三烽

太宗征遼故事

蓬萊有願占雲氣又美江山筆墨供

和元可贈別

惟憐蹤跡負平生愧予秋空萬里清體道信能忘聚散
論交曾復侯將迎愁多人物輸前輩恨有天公也世情
陽羨買田雖舊約虞歌喜起欲誰賡

王朴

海寓煎熬沸鼎時先生靜付一支頤單辭隱几三闕在
大畧平邊百世知到了勲庸成底事由來用捨出先幾
長槍不用毛錐子應使毛錐自用為

酬朱張二秀才皆次其首章韻二首

殃民政虐恐風傳鎮日窮愁蟬腹然化物未能參物格
高談無當若談天雅歌清唱俱流徵善聽多慙可絕弦
何事攔腰撞君價絕塵奔逸正吾前

萬緣政爾未能佳繪句彫鏤直謾誇客裏懸知君有謂
宦遊當念我何奢幾時西塞歌飛鷺指日東籬采菊花
五斗折腰良自苦奈今無粟飯胡麻

觀法帖

字學從前小藝林誰論終古可傳心毛錐劃劃龍蛇動

筆陣縱橫劒戟森須省六書兼八法由來一字直千金
世人不解張顛聖剛把碑文鎮日臨

夜聞桂香

秋香烈烈鎖房櫳龍麝腥羶不易同清素月中流夜魄
芬芳林下有家風記惟密雪開梅萼憶過疎籬採菊叢
獨有平泉舊詩句浪誇金粟竟非工

蓼花

不矜秀色傲春風笑倚斜陽露氣濃秋草淒涼風索索

江天寂靜水溶溶岸移晴漪飄仙袂葉起丹霞照玉容
可奈少香香似可為傳滋味入醺醺

社日

年去年來春復秋田豐土穀浪言疇敗家謔善崔文紀
率社均無曲逆侯燈燭靈壇三告祀燕鴻邊塞兩淹留
不須飲福傾樽酒聾過今生方始休

浪語集卷七

欽定四庫全書

浪語集卷八

宋 薛季宣 撰

詩

至樊口三首

一霎重為退谷遊扁舟一葉浪如舟人生百歲渾如許
借問都來幾白頭

小回中入大回中激水那堪拈面風退谷未煙聲叟笑

釣臺寧是不英雄

長安當日碎樊山
聞說孫郎鑿峴還
舴艋架虛掀舞甚
可堪破舶問前灣

宿大城寺

寺乃郡王故宮

斷煙疎竹鎖樓臺
郡子如今安在哉
明滅故城無限意
紫薇花傍夕陽開

新蟬無數咽新秋
無國伊誰伴我愁
夜靜月明風動竹
也疑離殿過歌喉

春草曲

二月二日未旦夢遊遇潦旋返見羣女魚貫舞
入大第行歌春草之曲其聲宛轉清暢不類今
之樂府寤而追記其詩

霰雪枝頭寒已老平蕪一夜鋪春草江梅著子怯東風
花落滿庭渾不掃

樊山春望

東郭城東安樂宮李花練綯玉玲瓏畫圖長喜平蕪綠

不覺身歸罨畫中

追和澹泊樓先祖詩韻

花木蕭疎一逕深
門前綠柳更森森
旁人錯比

陶潛宅澹泊仍無愛酒心

原韻

種柳栽花意已深
曾樓岳立千丈森
可須輪奐翬飛翼
會見逍遙天地心

赴調

三年蹤跡走泥塗
走遍泥塗一事無
今日又行當日路

旁人為我一揶揄

王征引

盆傾暑雨兩襄陵
三插苗心悉蠅生
一草不遺未黍地
若為芻秣事王征

喜聞

苦恨硃砂多亂玉
幾能沙礫盡披金
虞庠舊意無多子
也有蕭韶拊搏音

帳宿幡竿嶺

長笑飛芻饋六軍也
毆疲瘁逐征塵
楸林卓帳秋風夜
山鳥驚啁可笑人

黃陂縣懷古

尼丘非復貳先生
逐利滔滔盡舌耕
還憶蔡侯當日事
郢州知隔幾年程

記夢

二月八夜夢侍東坡先生
論靖康後事走謂宗
澤不死朝廷少假事權
究其施為國家決不至

是先生未答坐中或相詰難先生曰是所謂弼
枹然者走問其說先生曰有詩人與樂工言樂
詩人取琴鼓之其聲咿嚶然樂工之琴弼枹然
也遂寤不詳何謂作詩記之

通夢周公不我欺咿嚶無若太音希誰人伎子知誰在
一枕鄰雞曙已暉

病興即事

東風細細笙牙綠畏日曛曛天晝清萬緒不舉坐兀兀

林端駸駸兩三聲

無題

朦朧夜色暗浮雲
咫尺氛埃怯戰塵
深夜鳴榔到庭戶
江湖知有釣魚人

魏勃

異姓侯王約重陳
誰知興復自陪臣
滕公剛笑輕齊尉
大勇直須庸妄人

怒激三軍豈足言
漢庭股戰始能賢
齊卿不及公侯貴

擎跪偷生雄雉前

書溫公集後

不用須臾藏用即行未分丘壑與朝廷聲名怪得生來盛
非但潛心醉六經

讀舒王日錄

立志嚶嚶必致君四方觀聽一時新周家道備驪戎變
流俗元來不悞人

讀鬼谷子

牌闔乾坤若有神崎嶇長短困儀秦無聲無臭丈王道
應是先生浪鼓脣

新歲病起

牆外梅花渾欲飛縈人無奈柳依依窮愁三識新年面
猶喜常陪乳燕歸

桔槔

怪得朝來俯仰頻王明用汲有深仁無為抱甕先生笑
機械挪揄已玩人

聞鳩

桃李無情花自妍
竹根行復破苔痕
新婦抱兒未歸去
愧死鵲姑啼滿園

長湖以南李花彌滿山谷誠臺望之皞如也

層冰峨峨春不融
璧月皎皎夜常滿
明河入望浩無津
欲往從之人甚遠

酴醾花謝有感

當初曾醉浣花春
席地棠梨當錦茵
今日酴醾飄似雪

閒忙不比舊時人

巴口感事

曙煙帶柳日希微
一簇魚蝦市井遲
莫訝上官深致志
雲龍曾說鎖牙旗

十四日從諸同官登西山郊壇岡次孟監務韻

催人暖律段飛灰
高會蓮燈懶重陪
閒到蘇仙舊遊處
熙熙不祇登春臺

菩薩巖泉湛佛乘
澄泓無復現天燈
強歌下里酬春雪

便好為文弔剡藤

清遊無是亦無非
陡絕圓壇一強躋
赤壁望中公瑾在
戰塵何日靜征鼙

人間萬事盡浮埃
顧影窮遊莫倦陪
吳王百世不復在
只有九仞郊天臺

交神有道非關我
元夜虛張太乙燈
擬學昌黎慟西華
扳援石磴多蒿藤

不論人間是與非
崇丘礪鬼尚慵躋
登臨自有無窮意

安得閒愁滾地聲

讀史記

公旦征淮難定尾仲尼去魯速吹毛聖賢出處平生事
間不容針却中膏

黃霸

稱職關東漢吏良作公名損浩難量試看鷓鴣雀為神雀
無是飛蝗食鳳皇

假日

絕被蒙頭貪睡足
莎庭卧鼓喏衙遲
賓僚莫訝吾慵甚
忙裏偷閒亦暫時

將歸

閱世光陰雲掣電
忘形蹤跡浪浮萍
翩然行逐西風去
聊復人間得此生

戲寄清虛先生

鼾睡懶醒先處士
回光坐照老賓州

陳搏王翬皆有清虛之號

西來

大笑朝天子一宿不為桑下留

聞前月時事君舉象先皆與南宮之選是日讀易
詩春秋作四首

一陽萌動黃宮下正是寒威合減時閉戶先生莫惆悵
雷行龍躍定前期

我行永久亦何傷僕馬痛瘡不是忙田卒汙萊皇甫去
慙遺將若守吾王

憂河之濁欲清之每笑周人切見幾麟史究觀王室亂
異情元不是公非

我不知人人知我體交無味亦何為朝陽鳴鳳翔千仞
却是梧桐寔未離

州圖次元修韻三首

導水要窮神禹迹驅山每恨始皇移晉家安石非無事
高鎮伸頭看著碁

瞿眎盡道色非色愚聖共知東是東一紙畫圖都掌大
誰言遮壁意無窮

箋書莫笑蟲魚注善學須通天地心到盡粵南并薊北

始知前古是來今

書敬仲兄枕屏

野趣知兄愛泉石風屏少試秋毫力纖煤點染出雲天
萬里江山安枕席

歸計二首

浮雲何處是生涯念絕營營即是家洗脚渡頭歸去也
漢津無用逐靈槎

置錐無地也無錐幸可歸來特地疑船子月輪貧未破

羅浮馬用石頭為

青田同七五兄作四首

為聞雙鶴訪青田便有孤雲竟目前
灘水自鳴山自綠短蓬斜挂得酣眠

烏雲送雨過前山白鳥將雛向遠灣
獨立溪亭無箇事湍流瀧石鎮潺潺

浩歌歎乃客銷魂一抹煙林暝遠村
花為忘憂人一笑不知風雨作黃昏

谿翁夜傍清溪立千尺絲綸一紅粒
天空月白不見人
無聲露滴蘋蓼濕

追和寶山晝睡

浮生化國總輕塵已自忘真那得真
無物從教儘空洞
可須容著許多人

戲作贈別效東坡體次其韻

茹菜羹時嘗苦憶擣菹無路塞行期
難逢莫恨絲長斷
金鎖開絨自有時

雨中鶴唳

十萬虛屯野次兵不達符詔壽陽城
愁雲慘淡雨來急
鳴鶴一聲天未晴

啄木

竭蹶區區切考求飢腸一飽又何尤
要能去蠹無遺種
寥落空林死便休

鷺

綿蠻巧語慶青春金線低垂柳色新
定自知時厭流蕩

歸來空谷混泥塵

讀鬼詩擬作二首

坐對悲風嘯晚山
征鴻不記幾回還
青銅蝕破菱花面
慵掠烏雲綰髻鬟

王樂紛華苦未真
至遊無朕亦無身
細看浮世多塵土
如我得歸能幾人

李斯

獵盡山東六暴強
修明律令起秦皇
還思稅駕知無地

逐免應當爾許忙

詩書灰燼便秦文
便得秦王却誤身
斯具五刑秦再世
六經還有表章人

剛從荀卿學帝王
為羞貧賤速危亡
威嚴無復人居上
自處應慙廁鼠方

燕太子

意氣寧知錯感人
姬丹祕計謾危親
亡燕拜送於期首
政使荆卿趣帝秦

雨後憶龍翔寺

二峯高峙夾禪扃長路潮音逐磬聲老僧睡起絕無事
不管波濤四面生

窳堵東西岷兩峰王宮今日梵王宮潮船八面來勅敵
都入禪師燕坐中

秋意

月娥素魄溢嬋娟金吹淒涼冷淡天野水暝煙楓葉暮
黃花紅蓼獨嫣然

聞蟬

自闢筠鄉五畝陰
蟬聲無處不相尋
炎天喚起秋蕭索
便擬乘風遶鄧林

新蟬無數咽琅玕
引惹涼生六月寒
已自東山譽高潔
未須丹翅擬笙鸞

村居秋暮

風回偃水穀紋平
林末它山筆架橫
場圃未閒黃葉下
鵲鳩啼雨忽啼晴

睡香

君子清心省過祖師噩夢尋香莫問兩重公案且須一曲霓裳

擣菹

一局閒尋五木經檟操盧白意冥冥未能後擲如前擲
將奈長亭又短亭

公叔次開窓詩漫答

不同夷甫坐談空爛醉鳬鷺滅沒中聞說詩豪君是否

好磨長劍倚崆峒

幽蘭次十八兄韻六言四首

宛在一人空谷居然九畹深林襟袖不盈披拂車轍無蹤可尋

有美中郎芝砌言采洲明菊叢會取箇中香氣蕭然林下家風

舞奏八風薌澤頌聲焱氏遺音允矣不夷不惠悠哉非古非今

超出世間凡品
巨聞鼻觀餘香
春入有花不艷
院小無人自芳

浪語集卷八

欽定四庫全書

浪語集卷九

宋 薛季宣 撰

詩

詔書屯田湖北相土西鄉屬暑雨中旬轉入洪道
時雨初霽谿山蔥泚如在縉雲荆坑道中子規
之聲相聞屬道

沐雨驅車涉敗橋平原渺漫漲江潮華容葭葦憑誰燎

赤壁艤艫徒自燒一路規啼情悄悄九臯鶴唳思搖搖
道東直指松門去酷似故鄉歸路遙

書顏子傳後

幾庶都緣有若無寧論芻狗刳蘆蘆要須非復周公夢
而亦何為子夏書行葦至仁均草木中孚大信洽豚魚
窮神至命知奚事不遠周流意六虛

六月三夜夢觀某人詩什其書一章四絕蓋絕筆
也走讀竟太一真人來告語青猿手裏得長書靜

聞丹竈風中雨之句夢而默記之寤矣作詩道意
多謝真人警夢書青猿馴擾尚趙趙任從爐鼎喧風雨
爭柰神明復古初君樂鍊形咀丹火我甘飲水灌園蔬
惟當敬佩終焉意予欲無言致匪虛

讀伊川易傳

太極非名豈自然由知闢闢見坤乾先天詎必達中古
上古應須得後天至密退藏那有迹惟幾成務尚容研
從教變易能從道不似神龍得性全

樊口見鄭崇陽不遇

經時兀兀坐筠鄉
命駕崎嶇傍夕陽
島嶼西陵開卷畫
湖山東鄂洗新裝
路侵細草迷繁綠
風落閒花憶舊香
却上渡船歸去也
不逢安道故無妨

誠臺晚意

麥夏西山日脚斜
峯雲千里盡丹霞
晴嵐裊裊水春漲
芳草園林路晚花
遠近子規啼怨抑
高低乳燕語淫哇
官身歸是何年社
信美誠臺不似家

晨赴寒溪寺乾龍節道場所

曉入招提旋即還去何忙遽到非閒寒溪日出射煙霧
退谷路荒埋草菅林盡遠峯晴歷歷叢深流水暗潺潺
歸途鐘鼓依稀似將謂禪居別有山

新晴

起人舒慘作陰晴九十春光只雨零宿草未萌波漠漠
落花掃盡葉青青風生遠嶠銜明月霧斂長江吐漲汀
天意乍回心自廣片時雲路覺無形

勝亭雪望

上元雲路玉塵飛應是虬驂罷會歸望合郊原人世變
映浮城郭夜燈微連天忘却黃岡縣際水平將赤壁磯
滾滾長江耐澄撓浪回漚鳥一鷺翬

和賈簿

澄江風定也清寒咫尺渾疑醉夢間雪滿後湖真是浪
雲平西塞且無山輕鷗弄水情無限遠鴈書空時自還
靜極要當隨衆樂歸來燈火闌朱顏

和賈簿勝亭雪眺

攜壺命侶燕江干雪起顏垣梵玉闌減水湖中還素浪
明雲天際失青山無端大火寒無艷不奈生柴苦不乾
斷岸蘆洲見殘月一鉤忤視却前灣

艮止亭即事

艮止危亭欲暮春湖山江外翠眉顰鳥啼夕月清歌扇
花發荒原闌舞袖吳老洞迷青草暗陶公宅古綠蘿新
懷歸何日成歸計不念端居作主人

泊船

泊船在處即吾家解得熾烹爨有槎弄景日移煙岸柳
流香風度野薇花霞翻錦段浮江渚水落濤紋隱岸沙
塊坐竭來無一事夜深遠燒起殷霞

從孫元式假定本韓文

楊墨衰周亦既微仙雲妄欲數倫彝回瀾豈直萬人敵
斷簡傳將百世師脫落間亡烏魴墨蠹殘寧免白魚辭
校讎歆向君無愧聊以新詩當一甌

校畢歸之

倒墨扶周復古文清輝萬丈醇乎醇七篇奧義遠相繼
六代潛光今又新字假通才識魚魯車懸寡學改金銀
異書喜得君無靳此道中興知有人

勸農出郊

漫驅戎馬說農郊不見田疇見白茅洪道曉晴明水底
羊瀾春漲長林梢紅翻大澤霞方散青入空原草漸苞
迎峻示民民自勸可須杯酒薦烹炮

九日龍山之集

荊州作

年年九日登高會
九日登高年歲間
萸紫楓丹應共賞
橙黃橘綠正宜攀
今人不在古人後
往意何如茲意閒
風帽落簷誰得見
龍山還是昔龍山

冒雨渡江弔喪彭氏造雪堂夜歸

衝風節雨亂西江
弔死裴回問雪堂
叢枳介無春草碧
小橋蹤在古碑荒
人存有政名空大
世遠回思恨始長
旋棹晚雲何限事
可堪瑞慶柳成行

月波樓下草芊芊浪拍三江起暝煙願見古人人又去
欲詢往事事無傳窪樽明滅漁家火樊口依稀估客船
妻子迎門應怪笑問君何為苦周煎

酴醾花

東鄰處子太優柔醉倚欄干十二樓清白有家傳醞籍
醇醲無味飲風流帶搖翠握蒼蛟動佩解虹梁綠蟻浮
嘉禾自香香到骨困人非酒欲誰醺

牡丹

三春首出衆芳菲笑倚東風感翠眉洛浦未翔要玉佩
湯泉新浴曳桂衣無雙可奈傾城恨第一何堪代命為
桑柘不花花乍可清霜誰是不空枝

巖桂

羣芳未許論芳馨獨自秋天卧月明賴有幽香洞淵奧
寧將雅趣博輕盈德純不顯娥皇怨道大無聞叔度清
好向深巖伴黃石可知誰與桂花名

天閨

扁舟一葉轉寒溪
返照西陽日下西
旬浹不來江水漲
驚瀾幾欲上天墜

武昌懷古

漠漠煙村一故城
郊壇離殿草芽生
青山不解知興替
銷黯開顏為雨晴

筠鄉入夏野花方折

牆匝叢叢綉舞茵
一般顏面各精神
筠鄉不為東君去
野草閒花滿路春

艮止亭晚意

山影殊亭日轉西
牆頭歷歷片帆移
何人喚我頻歸去
側耳疎篁怨子規

艮止亭阻雨旬日

山亭無路少徘徊
跬步狂瀾漲九垓
不是蜃樓浮海外
也應弱水限蓬萊

艮止休工未落成
故人恨隔雨零零
眼前好景到不得
便是霄中望極星

晚渡東坡

赤鼻磯頭橫曙煙
吳王城下浪連天
聞道東坡妙天下
爾來靡日不盤旋

浮生萬事盡塵埃
瑞慶堂今榜快哉
惟有東坡舊煙柳
道人猶解指莓苔

行成西山

帝驅羆虎舊江州
旅卜僧坊計少休
避暑有宮留不暇
遊山算却是山遊

讀蕭銑傳

可怪梁朝幾帝王丘墟萬里變農桑
修文偃武知何政
町疇江陵盡鹿場

塊坐

萬緒絲棼汨太和終朝所得竟無何
放心收却且危坐
始覺忘機有味多

讀皇極經世書

大易誠知自畫前後天不識異先天
工夫用盡還無事

巧歷勞推不盡年

讀荆軻傳

廟算嘗聞勝五侯
輕生終不是良謀
秦王未許論生劫
畢竟還同撩虎頭

讀劉乂集

湯文不作幾經春
乂也賢乎隱澤民
古劍胷中儘磨淬
寧如覺道樂耕莘

伯丈人盆池開芙蓉十二

聞合天符下玉麟祝融湓浦肆時巡西山詎必須陵井
又得殄霞十二人

陵井十二玉女居之西山十二真人上仙處也

嘲欲借予雜橐者

神文道本可言形退也叔藏用即行要得任牽驢狗在
無端何似借書生

郎君到底亦何知奪卷書生真數奇惡語固應多艾氣
殘藤無用寫來詩

春遊

桃紅李白輝相曜
車馬交關遞流照
牆頭半露是秋千
不見美人聞語笑

即事

艾荷蕤蕤抽葦藻
風細幽香襲懷抱
庭竹琅然振玉音
葉落委堦慵不掃

殘花

小院銀瓶花落枝
驪山驚起睡楊妃
銷魂淚滴燕支雨
留得霓裳舊舞衣

瓶花盡落而梨花瀟洒如故

天帝南遊匹馬還紅雲作陣雨闌干駐顏下照如冰雪
一粒清涼得賜丹

寒食雨

言歸社鴈已家鄉紫燕呢喃識舊梁甚雨疾風寒食夜
旅人情緒一思量

江村聞笛

江村風色秋江渺林薄無人聞幽鳥長笛金吹一聲寒

知有漁舟釣紅蓼

遠景圖

蘆花飛鴈煙村靜一點青山波萬頃
人在孤舟喚不應
兒言客寫瀟湘景

慘澹平煙波浩渺隱月餘光飛白鳥
依稀一舸是漁舟
獨釣寒江天未曉

野望

水晶簾冷鋪寒玉翠帟高漲染螺綠
陣雲烏鷺點棋枰

一葉清旗動江曲

衰柳

秋草池塘夾黃纈
暮煙淡淡蒙新月
擬將攀取贈行人
脫葉枯條不堪折

浪語集卷九